

氤域水道記



蜀域水經記



西域水道記卷二

羅布淖爾所受水下

三源既合阿克蘇河從北來注之

阿克蘇近漢溫宿國地乾隆二十三年參贊雅爾哈善奏言八月二十日阿克蘇頭目摩羅等遣圖拉克呈降文並言霍集占從庫車逃往阿克蘇時將拜城回人移往和闐烏什復集葉爾羌回衆三千五百阿克蘇烏什之衆一千起程再援庫車望見大兵行塵仍回阿克蘇欲將阿克蘇人亦移往烏什人皆閉城不從霍集占攻之城中拒守霍集占乃往烏什等語臣給印文撫慰八月二十五日定邊將軍兆惠至領兵巡察入其城其境東接庫車西接烏什南接葉爾羌北接伊犁河水自其西北達其東南故以名之阿克蘇城西二百四十里爲烏什城兆公之

入阿克蘇城也霍集斯以烏什降置辦事一人治之烏什西北有蔥嶺

支山曰喀克善山阿克蘇河西支發焉源處極四十度五十分西四十

度五十分西支南流百里至額爾濟巴什嶺北一水自北來入之同東

流經胡什齊部布魯特界又經畢底爾卡倫南

在烏什城西九十里一作博得爾

是爲

畢底爾河又東有小石山高聳曰瑚什山賴黑木圖拉之亂賊據此峯

以拒官軍畢底爾河經其北分二支並東流經鷹落山北又東經烏什

城北城爲乾隆三十年重建素誠傳曰乾隆二十七年素城赴烏什辦

事誠父子及辦事筆帖式姦宿回婦伯克妻阿奇木伯克阿卜都拉恣

妄爲回人側目至三十年閏二月派回人運送沙棗樹誠令其子回京

而役回衆負行李小伯克賴黑木圖拉之妻曾爲素誠所淫積怨煽回

衆作亂夜焚劫倉庫誠與阿卜都拉登城拒守見賊勢衆素誠自戕其

後阿公桂與伊犁將軍明公瑞討平之盡誅逆黨徙喀什噶爾英吉沙爾阿克蘇諸城回民居焉置五品阿奇木伯克一人轄其屬重立鎮城周四百六十八丈有奇高丈七尺移喀什噶爾參贊駐之名城曰永寧門四城據山之東南面其山孤立四面距衆山皆七八里阿文成公年譜載公奏烏什之亂云賊運糧於城內默爾徹爾山是其名矣山勢險峻回語謂山石突出爲烏赤烏什卽烏赤也五十二年仍改置辦事一人駐巴里坤古城吐魯番八旗兵百四十人陝西甘肅綠旗兵百八十五人

嘉慶二十一年撥出六十名移駐阿克蘇

屯田兵二百五十人城西南至城東有屯田

三日寶興曰充裕曰豐盈凡五千畝皆引畢底爾河溉之三十年之役阿公桂奏賊投所積糧食於東門水磨又奏言焚西北門外所有水磨棄其麥麪蓋西北東三面近水隄水爲碓也河距城半里許南岸林木

蒹鬱如列屏幃圍賴黑木圖拉時大軍列營河北城蔽於樹礮攻不入
自閏二月至八月孤城不下忽一夕賊盡伐木石郭金城豁然呈露中
秋之日一鼓殲焉河經城北至城東八十里而滙兩河間回人居之烏
什之未復也明公瑞奏言五月十九日有馬上賊人兩隊前來我兵接
戰卽退又有步下賊人五百餘驅牛羊千餘在兩河之間牧放并刈取
枯草今有礮臺遺跡河之北岸二百里爲大山自西而東縣亘不絕直
畢底爾卡倫北曰海奇山又東曰色勒克塔什山又東曰奇什罕布拉
克山

蒙古語回語謂
泉曰布拉克

又東曰英阿喇特山又東曰蒙科素山又東曰科

克巴什山又東曰伊底克山又東曰臻丹山又東曰烏爾蓋列克山又
東曰木資魯克山又東曰烏玉布拉克山又東曰烏魯呼雅依拉克山
又東曰哈沙拉伊山與阿克蘇界統名曰貢古魯克山皆喀克善支峯

也貢古魯克山嵐嶂層複巖岫峻險山間溪澗縱橫谷中尤隘凡百餘

里劣容單騎有地曰南北郭羅南郭羅通伊犁之伊克哈布哈克卡倫

北郭羅則布魯特所游牧畢底陶河又東南流十餘里至提吐薩拉堤

莊北

西至烏什城九十里

出烏什境入阿克蘇境是爲托什干河

回語謂兔爲托什干河濱多兔

故名

往來者津逮於斯設二舟焉托什干河東南流四十里經帖列巴克

莊南

回部輔國公色提巴勒底者係烏什人舊居此莊有園尙存諺稱此莊曰色公園

又東流至察哈喇克軍

臺東

軍臺東距阿克蘇八十里

哲爾格哲克得之地

回語哲爾格林立之謂言沙棗樹成林也

與東支滙

霍集斯傳云定邊將軍兆惠抵阿克蘇偵霍集斯及子漠咱帕爾居烏

什馳檄招降軍繼進抵哲爾格哲克得霍集斯遣次子呼岱巴爾氏獻

書降翌日抵烏什霍集斯迎謁卽東西支交滙處也東支發楚克達爾

山爲瑚瑪喇克河南流八十里有湯那哈克河自阿克蘇城北六泉並

發同南流來匯由阿克蘇西行者亂茲二流以渡瑚瑪喇克河具舟四
湯那哈克河具舟二皆官給廩瑚瑪喇克河復東流至阿克蘇城西南
而與西支匯源處極四十一度三十分西三十九度阿克蘇舊屬烏什

嘉慶二年分爲專城城北至北山南至哈喇塔勒莊東南至赫色勒軍

臺東

在庫車西北
二百一十里

廣七百五十餘里輪二百餘里立岸如削高出地十

許丈其上平衍阿克蘇回城據其麓鎮城在其西北數十步地勢益下

同於釜底山泉泛溢隄若建瓴嘉慶十六年四月乙亥至五月朔己卯

雨不止庚辰山水大至繞回城入自鎮城東門

阿克蘇城偏其東門實在東南南門在西南西

門在北

城西北陷伊犁將軍晉公昌喀什噶爾參贊鐵公保重修治之城

周一百四丈高丈二尺門三鎮城回城間築堤洩水注於城南回語謂

白爲阿克言其地有白水故名其城也城南有稻田百五十畝乾隆二

十七年所開歲收稻米五百二石三斗五升置辦事一人轄回莊二十

二

聖製詩
注作三十一

駐烏魯木齊八旗兵六十人陝西甘肅綠旗兵六百

九十八人回城置三品阿奇木伯克一人轄其衆八千四百二十四戶

地產銅設廠二上銅廠曰雅哈阿里克廠

回語雅哈邊界也地臨邊界有渠水故名

銅產其

西南六十里楚午哈山

俗曰滴水崖

亦曰察爾齊克廠下銅廠曰溫巴什廠

回語十日溫頭曰巴什謂十人之長

銅產其南四十里鹽池溝山亦曰鄂依斯塔克齊克

廠置遊擊一人司之立錢局焉

回語錢曰雅爾瑪克一錢爲普爾直銀一分初以五十普爾爲一騰格後定百

普爾爲一騰格直銀一兩謂一日必爾二日伊奇三日裕赤四日托爾

托五日伯什六日阿勒題七日葉題八日薩奇資九日托古斯十日溫

百曰玉資千曰明萬曰圖滿舊回普爾小於制錢厚而無孔一面帕爾

西字鑄葉爾羌地名一面厄魯特之托特字鑄準噶爾台吉名乾隆二

十五年九月葉爾羌開局收回普爾改鑄制錢面文曰乾隆通寶用漢

字幕文曰葉爾奇木左國書右回字重二錢以一制錢當二普爾嗣改

幕文曰葉爾羌供喀什噶爾葉爾羌和闐三城用三十三年回普爾收

盡停葉爾羌局阿克蘇局平定初參贊舒赫德立之賦回人銅鑄以供

阿克蘇烏什庫車哈喇沙爾賽喇木拜六城用重同葉爾羌三十一年
尚書永貴移局於烏什三十五年定制重一錢五分幕文曰烏什嘉慶
三年參贊長麟復移局於阿克蘇定制重一錢二分幕文曰阿克蘇五
年定制歲鑄乾隆通寶錢二成嘉慶通寶錢八成凡額銅歲鑄錢二千
六百餘千文餘銅歲鑄錢一百二十千文統名曰普爾一當制錢五回
城通用至吐魯番托克三軍臺止東西支匯東流六十里復分爲東西二支
西支南流經艾柯爾莊東莊在阿克蘇城南百三十里一作艾扈爾

爲艾柯爾河艾柯爾莊者郡王霍集斯故里也霍集斯於乾隆二十五

年三月移居京師留其幼子托克托索丕守墳墓今猶聚族居焉艾柯

爾河又南流至渾巴什軍臺西南三十里

軍臺距阿克蘇城八十里

折而東南流經

伯什阿里克莊南

莊距阿克蘇城百六十里

復東南流而與東支匯凡行二百里東

支東南流經阿克蘇城南

距城四十餘里

又東南流經渾巴什軍臺東三十餘

里是爲渾巴什河水寬里許有渡船二余旋程五月河流未盛已有浩

淼之思矣元史耶律希亮傳中統四年至可失哈里城四月阿里不哥

兵復至希亮又從征至渾八升城按渾八升城卽今渾巴什莊矣渾巴

什河東南流經渾巴什莊北是爲楚克達爾河又東南流經伯什阿里

克莊北又東南流至哈喇塔勒莊南莊在阿克蘇城東南二百里而與西支滙是爲

哈喇塔勒河亦行二百里哈喇塔勒莊在扎木軍臺南蒙古語扎木道

阿克蘇城東八十里地當孔道故名與和闐界昔富公德援和闐經行沙磧置臺站六於

斯今車騎不通河流又萃豐草長林是多禽獸哈喇塔勒河南流至噶

巴克阿克集北境與蔥嶺于闐河會會處極四十度十五分西三十六

度四十分凡茲四河蔥嶺二源最長喀什噶爾河二千七百餘里葉爾

羌河二千一百餘里和闐河長一千一百里阿克蘇河長九百餘里交

流奔赴迸以東行河源紀略云會處四水交貫形如井欄水經注云北

河逕溫宿國南於此枝河右入北河枝河卽阿克蘇河也水經注又云

北河又東逕姑墨國南姑墨川水注之水導姑墨西北赤沙山東南流

逕姑墨國西姑墨川水唐之撥換河今之阿爾巴特河亦曰阿察哈喇

河阿察同語分支岐出之謂河有分支望之色黑也出阿克蘇城北瑪咱爾溝山中東南流經

和約伙羅克軍臺南軍臺在阿克蘇城東北二百四十五里繞鹽山東鹽山者自麓至巔

赤土壁立草木不生土中產冰鹽小者如拳大者如盤光明似水晶已

目疾口病故山有赤沙之號漢時烏孫治赤谷城疑在此山中也水經山之東而南流經

哈喇裕勒袞軍臺西同語裕勒袞謂垂柳柳陰深黑故名軍臺在阿克蘇城東一百六十里其地古姑墨

國也又南入沙而伏長凡三百里不入北河與酈君時異哈喇裕勒袞

之東百二十里爲滴水崖皆沙磧唐書西域傳自龜茲踰小沙磧謂此

也

又東克勒底雅河從南來注之

和闐額里齊城東十里爲玉隴哈什村極三十六度五十二分西三十

六度二十分玉隴哈什之東南二百三十里爲齊爾拉村極三十六度

四十七分西三十五度四十分齊爾拉之東北百八十里爲克勒底雅

城極三十六度五十八分西三十四度三十分塔克村在克勒底雅南三百五十里極三十六

度十三分西三十四度四十五分城據南山曰克勒底雅山有徑通藏地康熙五十八

年六月四川總督年羹堯疏言近者西藏諸部落以貝勒達顏病故藏衛

舊汗曰藏巴汗噶爾瑪丹炯旺博有和碩特之顧實汗滅之留主其地達顏卽顧實汗長子嗣爲汗人人有相吞併意聞

策零敦多布現令左哨頭目春丕勒率兵六百餘過喀喇烏蘇河往青

海又聞發兵八千來藏已至葉爾羌克勒底雅雍正元年六月青海羅

布藏丹津顧實汗之孫達什巴圖爾之子襲和碩親王以叛削爵將由克勒底雅入藏松潘鎮總

兵官周瑛選精騎三百貝勒康濟鼐西番語作康臣鼐索特納木佳勒博漢字從轉音稱康濟鼐初爲阿

里噶爾本封貝子
後辦噶卜倫事

帶番兵萬餘由楊八景追至噶勒藏骨岔阻雪乃止

西藏志曰自衛藏招正北行二十四日至納克產又十五日至書隆沙

爾又十八日至克勒底雅城是也

西藏志又云自阿里西北所屬之魯都克城十五日至葉爾羌蓋有兩路

可達克勒底雅在藏正北葉爾羌在藏西北也

克勒底雅山千餘里淤沙積雪烟瘴逼人冬夏

不可行水發山中北流經克勒底雅城東唐西域記云瞿薩旦那城東

南百餘里有大河西北流國人利之以用溉田其後斷流王深怪異於

是命駕問羅漢僧曰大河之水國人取給今忽斷流其咎安在羅漢曰

龍所爲耳宜速祠求當復昔利王因迴駕祠祭河龍忽有一女凌波而

至曰我夫早喪主命無從所以河水絕流農人失利王於國內選一貴

臣配我爲夫水流如昔王曰敬聞於是舉國僚庶鼓樂飲餞其臣乃衣

素服乘白馬與王辭訣敬謝國人驅馬入河履水不溺濟乎中流麾鞭

畫水水爲中開自茲沒矣頃之白馬浮出負一旃檀大鼓封一函書河水遂流至今利用卽此河矣唐書云于闐東三百里有建德力河河東有建德力城亦曰拘彌城卽寧彌故城今河在城東城郭遷移不足爲異河北流三百里入大河

又東過布古斯孔郭爾郭境北爲額爾勾河

回語孔郭爾郭野果名布古斯謂腹借以喻果實之大也地在額里齊城東北五百餘里距噶巴克阿克集近百里極四十度二十五分西三十六度二十分午正日景夏至長三尺一分冬至長二丈二寸六分春秋分長八尺四寸七分其境南皆沙磧中有大山縣亘沙圖圖嶺支峯也

沙圖見上沙圖圖者狀其層出

大河逕其北爲額爾勾河準語謂河流迴抱爲額爾

勾也唐書地理志云姑墨州南臨思渾河是其異名矣布古斯孔郭爾

郭東二百五十里至葉伊勒于

同語葉伊勒開展之義于謂平也言其地寬平

又東八十里至

葉勒阿里克

同語葉勒風也地有水渠流急如風

又東北七十里至沙雅爾城

同語沙部長之謂雅

爾軫卹之詞舊有伯克軫卹其部也

又東過沙雅爾城南

沙雅爾者庫車屬城也

帕爾西語庫謂此地車謂省井地舊有省井也

庫車爲漢龜茲國北境

元史西北地附錄作庫徹霍集占之倡亂也大軍征之自庫車始乾隆

二十三年五月入庫車境六月十六日薄其城靖逆將軍雅爾哈善遣

領隊大臣愛隆阿攻其南副都統順德訥戰其西皆敗賊追至鄂根河

霍集占以兵三千渡河來援左肩中矢陣獲其纛霍集占自西門入城

守二十三日夜半復以四百人出西門渡鄂根河去八月五日城中賊

亦遁舊伯克阿集等以庫車城降沙雅爾伯克瑪哈默第亦遣子阿三

和卓獻城庫車城周四里六分六釐門四沙雅爾城周二里許高丈四

尺南北門二明年西域平於庫車置辦事一人駐陝西甘肅綠旗兵三

百二名兩城相去百八十里

沙雅爾城在庫車城正南

中以亮格爾爲界

回語謂憩息之所曰

亮格爾北距庫車城百里南距渭干河七十里

亮格爾以南沙雅爾伯克主之以北庫車伯克

主之沙雅爾額徵糧八百七十二石六斗紅銅三百五十八觔十兩五

錢火藥三百觔硫磺一百觔硝一百觔城所在極四十度五十五分西

三十四度十五分午正日景夏至長三尺一寸七分冬至長二丈一尺

二分春秋分長八尺七寸二分其境東至斯爾里克墨洗提三百二十

五里

地有禮拜寺已毀

東南至耶哈里三百里城西六十餘里爲賽拉里克卡

倫卡倫西三百二十里地曰塔什根柯里卡倫西南二百四十里地曰

巴什克雅克皆與阿克蘇哈喇塔勒莊通爲達喀什噶爾葉爾羌閒道